

歷代詩話續編



南豐曾季狸裘甫著

無錫丁福保仲祐訂

韓退之樹雞詩云煩君自入華陽洞割取乖龍左耳來予按割龍耳事兩出柳子厚龍城錄載茅山處士吳綽因採藥於華陽洞見小兒手把大珠三顆戲於松下綽見之因詢誰氏子兒奔忙入洞中綽恐爲虎所害遂連呼相從入得不二十步見兒化龍形一手握三珠填左耳中綽以藥斧斲之落左耳而失珠所在又馮贊雲僊散錄載崔奉國家一種李肉厚而無核識者曰天罰乖龍必割其耳血墮地生此李未知退之所用果何事然龍城錄載割華陽洞龍左耳事而雲僊散錄乃有乖龍割耳之說二書各有可取也洪慶善注韓文甚詳而於此獨缺文不知其如何也

唐人詩用遲字皆得意其一柳塘春水漫花塢夕陽遲嚴維詩也其一  
鑪烟添柳重宮漏出花遲楊巨源詩也又韋蘇州細雨詩漠漠帆來重

冥冥鳥去遲亦佳句。

前人詩用重字有三。雨壓梨花烟重。雪壓梅花香重。殘月落花烟重。皆有思致。呂東萊尤喜雪壓梅花香重。

前人詩言落花有思致者三。王維興闌啼鳥換。坐久落花多。李嘉祐細雨溼衣看不見。閒花落地聽無聲。荆公細數落花因坐久。緩尋芳草得歸遲。

原缺四行每行二十字

東湖言癩可初作詩。取前人詩得意者手寫之。目爲顛倒篇。自後其詩大進。

東湖言荆公桃源行前二句倒了。望夷宮中鹿爲馬。秦人半死長城下。當言秦人半死長城下。望夷宮中鹿爲馬。方有倫序。

東湖言荆公畫虎行。用老杜畫鶲行。奪胎換骨。

原缺二行每行二十字

老杜詩中喜用秦字。予嘗考之。凡押秦字韻者十七八。章賢初相漢范

叔已歸秦今欲東入海卽將西去秦錦江元過楚劍閣復通秦西江元下蜀北斗故臨秦錦谷元通漢沱江本向秦接輿還入楚王粲不歸秦蘇武先還漢黃公豈事秦此生那老蜀不死會歸秦地平江動蜀天闊樹浮秦近聞王在洛復道使歸秦地利西通蜀天文北照秦兵戈禍擁蜀聚歛強輸秦故園當北斗直指照西秦商山猶入楚渭水不離秦泊船悲喜後欵欵話歸秦比來相國兼安蜀歸赴朝廷已入秦蓋老杜秦人也故喜言秦

晏叔原小詞無處說相思背面鞞韁下呂東萊極喜誦此詞以爲有思致然此語本李義山詩云十五泣春風背面鞞韁下

呂東萊粥香餳白是今年粥香餳白四字本李義山寒食詩云粥香餳白杏花天

老杜詩公孫大娘舞劍器行世人多以爲公孫能舞劍非也蓋公孫善舞劍器劍器者曲名也詩序言公孫氏舞劍器渾脫又言舞西河劍器然則渾脫西河劍器三者皆曲名也詩中又言妙舞此曲神揚揚則知

爲曲信矣。安有婦人能舞刀劍者乎。後人承誤不能深考耳。

東坡平山堂詞云。認取醉翁語。山色有無中。然山色有無中。本王維詩。江流天地外。山色有無中。

東坡羨君懷中雙橘紅。用陸續事也。以續傳考之。云懷中橘三枚。郤不云二枚也。

東湖論作詩。喜對景能賦。必有是景。然後有是句。若無是景而作。卽謂之脫空詩。不足貴也。

東湖喜呂東萊。樹陰不礙帆影過。雨氣卻隨潮信來。東湖見予誦東萊詩云。傳聞胡虜三年旱。勢合河山一戰收。云何不道不戰收。

東湖又見東萊。滿堂舉酒話疇昔。疑是中原無是時。云不合道破話疇昔。若改此三字。方覺下句好。

原缺二行每行二十字

韓子蒼作送呂東萊赴召詩。甚得意。東萊止稱一句。厭見西江殺氣纏。云是詩語。

東湖喜錢氏子忘其名一聯云鷗飛波蕩綠牛臥草分青。  
東萊送珪公果公入閩中詩五言宿昔春水生者絕似選詩東萊自云。  
東萊濟陰寄故人柳絮飛時與君別有兩本者東萊少時作後失其本。  
在臨川因與學徒舉此詩亡之遂用前四句及結尾兩句補成一篇已  
而得舊詩遂兩存之落花寂寂長安路者是舊詩千書百書要相就者  
是追作。

東湖喜荆公燕侍郎畫山水圖詩其間云燕公侍書燕王府王求一筆  
終不予以仁人志士埋黃土只有粉墨歸囊楮此可謂能形容燕公也。  
崔德符詩人閒火定熱我死不肯炙真節士之詩。

荆公汴水詩云相逢故人昨夜去不知今日到何州州中人物不相似。  
處處蟬聲令客愁讀此足知汴水湍急一日動數百里。

荆公北山梅花何所似一篇詩意高遠。

東湖紫極宮七言詩自云爲七言之冠東萊亦喜此詩。  
山谷贛上食蓮詩讀之知其孝弟人也東湖每喜誦此詩。

呂東萊喜令人讀東坡詩。

東萊不喜荆公詩云。汪信民嘗言。荆公詩失之軟弱。每一詩中必有依依嫋嫋等字。予以東萊之言考之。荆公詩每篇必用連綿字。信民之言不繆。然其精切藻麗。亦不可掩也。

老杜桃竹引云。忽失雙杖兮吾將曷從。雙杖喻李郭二人也。

山谷和高麗松扇詩云。可憐遠渡幘溝瀉。不堪今時搢櫟子。幘溝瀉。高麗城名也。見三國志。搢櫟子用程曉伏日詩。今時搢櫟子。觸熱向人門。韓退之雪詩。筭詩皆譏時相。雪詩云。未能裨獄鎮。強欲效鹽梅。松篁遭挫折。糞壤獲饒培。巧借奢豪便。專繩困約災。威貪凌布被。光肯離金靈。筭詩云。得時方張王。挾勢欲騰騫。縱橫公占地。羅列暗連根。始訝妨人路。還驚入藥園。萌芽防寢大。覆載莫偏恩。外恨包藏密。中仍節目繁。戈矛頭戢戢。蛇虺首掀掀。身寧虞瓦礫。計欲掩蘭蓀。其言皆有譏誚。非徒作也。

老杜詩云。河內無因借寇恂。然借寇事在南陽潁川。非在河內也。

老杜青青竹筍迎船出.白白江魚入饌來.山谷云此送人迎庭闈詩故用此二事皆孝於親者.然王祥臥冰於魚事用之則可.孟宗乃母亡後思母所嗜.冬月生筍恐不應用也.

大凡人爲學不拘蚤晚高適五十歲始爲詩老蘇二十七歲始爲文皆不害其爲工也.

古人於前輩未嘗敢忽雖不逮於已者亦不敢少忽也以韓退之於文杜子美之於詩視王楊盧駱之文不啻如俳優而王績之文於退之猶土苴爾然退之於王勃滕王閣記王績醉鄉記方且有歆豔不及之語子美於王楊盧駱之文又以爲時體而不敢輕議古人用心忠厚如此異乎今人露才揚已未有寸長者已譏議前輩此皇甫持正所以有衙官老兵之論衙官非持正語

韓子蒼詩塵緣吾未斷不是薄蓬萊薄蓬萊三字蓋柳子厚謫龍說吾薄蓬萊羞昆侖.

陳後山爲正字詩云寧辭乳媼譏用南史何承天事.

呂東萊詩用拍張公事。出南史王儉傳。王敬則云。臣以拍張得爲三公。荆公賀曾魯公詩云。功謝蕭規慚漢第。恩從隗始愧燕臺。人多疑隗始無出處。不知韓退之聯句云。受恩從隗始。則隗始出於韓文也。按隗始二字出國語

韓子蒼泛汴詩云。汴水日馳三百里。末章郤云。水色天光共蔚藍。汴水黃濁。安得蔚藍也。東湖詩云。晝暖坐迎日。夜寒眠見星。說者謂能盡泛汴之景。

東湖宮亭湖詩極佳。嘗自誦與予言。沙岸委咤白雲林迤邐青千山擁廬阜。百水會宮亭。說得景物出身在宮亭經行。方見其工。予謂此詩全似老杜。

東湖畫虎圖詩云。不向南山尋李廣。郤來東海笑黃公。黃公虎事見李善文選注。

唐人薛能詩云。青春背我堂堂去。白髮催人故故生。有人舉此詩稱其語意之美。呂東萊聞之笑曰。此只如市井人歎世之詞。有何好處。予以東萊之言思之。信然。

呂東萊喜張文潛七夕歌令人誦。

呂東萊喜潘邠老浯谿詩。

山谷筆詩云。宣城變樣蹲鷄距。諸葛名家捋虎鬚。予嘗見東湖口誦與此本不同。云。宣城諸葛尊鷄距。筆陣王家將鼠鬚。鷄距鼠鬚皆筆名也。言蹲言捋。則無意義。言尊言將。則有理。東湖喜誦此詩。又喜知常軒詩。卽新晴鼓角報斜陽者是也。二詩皆親見其誦。

山谷詩人米事用北史盧思道事。

山谷謝人茶詩云。涪翁投贈非世味。自許詩情合得嘗。出薛能茶詩云。麤官乞與真拋郤。只有詩情合得嘗。

東湖明皇夜遊圖詩。宣和閒作。其意蓋諷當時也。詩中云。苑風翠袖溼。宮露赭袍光。可見其遊宴達旦也。閨閣連闌闥。驛驅從驃驅。可見其宮禁與外無間也。東湖嘗對予自釋其意如此。

前人詩言立鷺者。凡三歐公稻田水浸立白鷺。東坡潁水清淺可立鷺。呂東萊稻水立白鷺。皆本於李嘉祐。漠漠水田飛白鷺。然翦截簡徑。則

東萊五字盡之矣。

東萊喜東坡贈眼醫王彥若詩。王履道亦言東坡自負此詩多自書與人。予讀其詩如佛經中偈贊真奇作也。

張元幹紹興間人。詩不多見。其人蓋嘗識東湖。所謂詩如雲態度。人似柳風流者是也。後以累失官。有瀟湘圖詩甚佳。云落日孤煙過洞庭。黃陵祠伴白蘋汀。欲知萬里蒼梧恨。淚盡君山一點青。

古今遊廬山詩。予得兩首絕佳。其一潘子真詩。話所載王光遠云。明朝山北山南路。各自逢人話勝遊。蓋廬山之美不可盡。惟此兩句形容得極佳。又張元幹詩云。古木寒藤挽我住。身非靖節誰能留。多慚不及鸞谿水。長向山前山後流。此詩興致極高遠。

東湖滕王閣詩。用老杜玉臺觀詩本首云。一日因王造。千年與客遊。卽老杜浩劫因王造。平臺訪古遊也。

老杜端午賜衣詩。自天題處涇。當暑著來輕。自天當暑。皆有出處。自天申之。當暑袗絺綌是也。

秦少遊在嶺外貶所。有詩云。揮汗讀書不已。人皆笑我何求。我豈更求聞達。日長聊以消憂。其語平易渾成。真老作也。今集中不見有之。予見呂東萊之子逢吉口說。

杜詩鷺費羲之墨。貂餘季子裘。今草堂石本作鷺貴羲之墨。貴比費雖無義理。然草堂入石本。不應有誤也。

老杜有岳陽樓詩。孟浩然亦有浩然雖不及老杜。然氣蒸雲夢澤。波撼岳陽城。亦自雄壯。

老杜螢火詩。蓋譏小人得時。其首云。幸因腐草出。敢近太陽飛。蓋言其所出卑下也。其卒章云。十月清霜重。飄零何處歸。蓋言君子用事。則掃蕩無遺也。老杜之詩。所以冠絕古今者。以此。詩人李嘉祐。亦嘗賦螢火詩云。映水光難定。凌虛體自輕。夜風吹不滅。秋露洗還明。向燭仍藏焰。投書更有情。猶將流亂影。來此傍簷楹。八句規規然詠一物而已。視杜詩。真所謂小巫也。

老杜寫物之工。皆出於目見。如花妥鷺。捎蝶谿喧。獵趁魚芹泥。隨燕觜。

花粉上蜂鬚。仰蜂黏落絮。行蟻上枯梨。柱穿蜂溜蜜。棧缺燕添巢。風輕  
粉蝶喜。花暖蜜蜂喧。非目見安能造此等語。又杜詩中喜言蜜蜂。如上  
所錄是也。

山谷用酒渴愛江清爲韻。人知爲唐人詩。而不知其爲誰氏也。顧陶詩  
選載暢當作。當有詩名。其詩云。單中醉飲作。其前四句云。酒渴愛江清。  
餘酣漱晚汀。軟莎欹坐穩。冷石醉眠醒。皆佳句。狀得醉與酒渴之意極  
工。

東坡與王郎書云。少年爲學者。每一書皆作數次讀。書之富。如入海百  
貨。皆有人之精力。不能兼收盡取。但得其所欲求者爾。故願學者每次  
作一意求之。如欲求古今興亡治亂。聖賢作用。且只作此意求之。勿  
生餘念。又別作一次求事迹文物之類。亦如之。他皆倣此。若學成八面  
受敵。與涉獵者不可同日而語。以上皆東坡尺牘中語。此最是爲學下  
工夫捷徑。予少時亦頗窺見此術。然不能以此告人。及見東坡所言。犁  
然當人心。善爲學者。不可不知也。玉郎即子由之壻。今坡集亦有此書。但有論說及賈誼陸贊之學者。不見此幅。此蓋書之別紙也。

陶淵明詩自宋義熙以後皆題甲子此說始于五臣注文選云爾後世遂因仍其說治平中有虎丘僧思悅者編淵明集獨辨其不然其說曰淵明之詩題甲子者始庚子迄丙辰凡十七年間九首皆晉安帝時所作及恭帝元熙二年庚申歲宋始受禪自庚子至庚申蓋二十年豈有宋未受禪前二十年恥事二姓而題甲子之理哉思悅之言信而有證矣

前人論詩初不知有韋蘇州柳子厚論字亦不知有楊凝式二者至東坡而後發此秘遂以韋柳配淵明凝式配顏魯公東坡真有德於三子也

東坡黃子思詩序論詩至李杜字畫至顏柳無遺巧矣然鍾王蕭散簡遠之意至顏柳而盡魏晉詩人高風遠韻至李杜而亦衰此說最妙大抵一盛則一衰後世以爲盛則古意必已衰物物皆然不獨詩字畫然也

荆公詩云祇向貧家促機杼幾家能有一鉤絲山谷詩云莫作秋蟲促

機杼貧家能有幾鉤絲。二詩語甚相似。

陶淵明詩白日淪西河素月出東嶺一篇說得秋意極妙。韓退之秋懷。窗前兩好樹惻惻鳴不已。一篇亦好。雖不及淵明蕭散。然說得秋意出。予每至秋喜誦此二詩及歐公秋聲賦。

東湖喜誦韋蘇州贈王侍御詩心如野鶴與塵遠。詩似冰壺見底清一  
篇真佳句也。

韓子蒼憶昨昭文並直廬。與君三歲侍皇居。花開輦路春迎駕。日曬蓬  
山曉曝書。學士南來尙巖穴。神州北望已丘墟。忽逢漢節滄江上。握手  
西風淚滿裾。全用韋蘇州詩爲乏。蘇州詩云與君十五侍皇闈。曉拂爐  
煙上赤墀。花開漢苑經過處。雪下驪山沐浴時。近臣零落今猶在。仙駕  
飄颻不可期。此日相逢非舊日。一林成喜又成悲。

東湖喜言黃庭及文選詩。

東湖言王維雪詩不可學。平生喜此詩。其詩云寒更催曉箭。清鏡減衰  
顏。隔牖風驚竹。開門雪滿山。灑空深巷靜。積素廣庭間。借問袁安舍。翛

然尙閉關又言柳子厚雪詩四句說盡。

東湖言荆公詩多學唐人然百首不如晚唐人一首。

東湖言荆公月移花影上闌十不是好詩予以爲止似小詞。

東湖言山谷詩對櫈櫟子對得不親。

東湖自言作詩至德興方知前日之非。

東湖喜山谷落星寺詩。

高子勉國香詩極好有唐人歌行筆力。

荆公送人使虜詩云留犿撓酒見戎心繡祫通歡歲月深秦少遊送人使虜亦云留犿撓酒知胡意尺牘貽書見漢情皆用留犿撓酒事見匈奴傳韓昌張猛與單于盟單于以路徑刀金瑠璃撓酒注撓

荆公定林詩云定林修木老參天橫貫東南一道泉五月枝藜尋石路午陰多處弄潺湲嘗見許子禮吏部云渠親見定林題壁不云修木云喬木不云石路云去路不云弄潺湲曰聽潺湲又試院中詩云白髮無聊病更侵移牀向竹臥秋陰子禮云見荆公真本不云向竹臥秋陰郤

云臥竹向秋陰。皆與印本不同。

東湖詩云。芙渠漫漫疑無路。楊柳蕭蕭獨閉門。荆公云。漫漫芙渠難覓路。蕭蕭楊柳獨知門。又唐人劉威云。遙知楊柳是門處。似隔芙渠無路通。三人者同一機杼也。

東湖云。荊公謝安詩云。一去可憐終不返。暮年垂淚對桓伊。蓋譏安也。而其詩自言志。郤云殘年歸去終無樂。聞說章江卽淚流。何其與譏安相反邪。

人問韓子蒼詩法。蒼舉唐人詩。打起黃鸝兒。莫教枝上啼。幾回驚妾夢。不得到遼西。予嘗用子蒼之言。徧觀古人作詩規模。全在此矣。如唐人詩。妾有羅衣裳。秦王在時作。爲舞春風多。秋來不堪著。又如曲江院裏題名處。十九人中最少年。今日風光君不見。杏花零落寺門前。又如荊公詩。淮口西風急。君行定幾時。故應今夜月。未便照相思。皆此機杼也。學詩者不可不知。

東萊木芙蓉絕句云。小池南畔木芙蓉。雨後霜前著意紅。猶勝無言舊